

Ni Pangulong  
Dieter F. Uchtdorf  
Ika-duhang Manuglaygay sa  
Unang Panguluhan



# ‘Tol, Nakapangako Na Ako

D uha ka mag-utod nga pamatan-on nagtindog sa isa ka gamay nga banglid nga nagatamwa sa matin-aw nga tubig sang isa ka maasul nga lawa. Isa ini sadto ka bantog nga lulumpatan [diving spot], kag ang mag-utod masami nagsugilanon nga maglumpat—isa ka butang nga ila nakita nga ginahimo sang iban.

Bisan pa nga pareho nila luyag maglumpat, wala sing isa sa ila nga luyag mag-una. Ang kataason sang banglid indi man gid tuman, apang para sa duha ka pamatan-on, ang kataason sini daw nagadugang sa tion nga magsugod sila sa pagtamwa—kag ang ila kaisog madasig nga nagatahaw.

Sang ulihi, ang isa ka utod nagtikang sang isa niya ka til sa bibi sang banglid kag determinado nga nagpasulong. Sa sina nga tion ang iya utod naghutik, “Maayo pa seguro mahulat na lang kita sang sunod nga tig-ilinit.”

Apang, ang pwersa sang una nga utod nagaduso na sa iya pasulong. “Tol,” sabat niya, “Nakapangako na ako!”

Naglumpat sia sa tubig kag madasig nga nagbutwa nga nagsinggit sang kadalag-an. Ang ikaduha nga utod nagsunod man gilayon. Pagkatapos, pareho sila nga nagkadlaw parte sa katapusan nga mga pulong sang una nga pamatan-on antes sia maglumpat sa tubig: “Tol, nakapangako na ako.”

Ang pangako daw pareho diutay sa paglumpat sa tubig. Kon bala nakapangako ka ukon wala. Kon bala nagapasulong ka ukon nagapabilin nga nagatindog. Wala sing tungatunga. Tanan kita nagaatubang sang mga higayon sa pagpamat-od nga nagabag-o sa nabilin naton nga mga kabuhi. Bilang mga miyembro sang Simbahán, kinahanglan naton pamangkuton ang aton mga kaugalingon, “Malumpat bala ako ukon matindog lang sa bibi? Matikang bala ako pasulong ukon tilawan lang sang akon mga tudlo sa tiil ang kabugnaw sang tubig?”

May pila ka mga sala ang nahimo tungod indi husto ang aton ginahimo; ang iban naman nga mga sala nahimo tungod wala kita sing ginahimo. Ang medyo lang nga pagdedikar sa ebanghelyo sarang magpadulong sa kapaslawan, kasubo, kag kabasulan. Indi ini dapat matabo sa aton tungod mga tawo kita nga may kasugtanán (sa Dios). Nagahimo kita sang mga kasugtanán sa Ginuo kon kita ginabunyagan kag kon kita mag-sulod sa balay sang Ginuo. Ang mga lalaki nagahimo sang mga kasugtanán sa Ginuo kon sila ginaordin sa priesthood. Wala na sing mas importante pa sangsa pagtipig sang pangako nga ginhimo naton sa Ginuo. Dumdumon naton ang sabat nanday Rachel kag Lea sa kay Jacob sa Daan nga Katipan. Yadto simple lang kag direkta kag nagpakita sang ila pangako: “Ano man ang

ginsiling sang Dios sa imo, himoa” (Genesis 31:16).

Ang yadtong medyo lang nga dedikado mahimo magpaabot sa pagbaton sang medyo lang nga mga bu-gay sang panaksihon, kalipay, kag paghidaet. Ang mga bintana sang langit mahimo nga medyo lang nga bukas para sa ila. Indi bala kabuangan inang magpanumdom, “Idedikar ko ang akon kaugalingon sing 50 porsyento sa karon, apang kon si Cristo mag-abot na sa ikaduha nga Pagkari, idedikar ko ang akon kaugalingon sing 100 porsyento”?

Ang pagpangako sa aton mga kasugtanan sa Ginuo amo ang bunga sang aton pagkahaylo. Ang pagpanako sa aton Manluluwas kag sa Iya Simbahan naga-pasad sang aton pamatasan kag nagapabakod sang aton espiritu agud nga kon makita naton si Cristo, hakson Niya kita kag magsiling, “Maayo gid, ulipon nga maayo kag matutum” (Mateo 25:21).

May yara sing kinalain sa tunga sang tinutuyo kag buhat. Ang yadtong nagatuyo pa lamang sa pagpanako mahimo nga magpamalibad sa tagsa ka tion. Ang yadtong matuodtuod gid nga nagapangako direkta nga nagaatubang sang ila mga hangkat kag nagasiling sa ila mga kaugalingon, “Huo, mahimo nga maayo kaayo ina nga rason agud padugayon, apang nakahimo ako sang mga kasugtanan, gani himuon ko ang ginpangako ko nga himuon.” Nagatuon sila sang balaan nga mga kasulatan kag maukod nga nagapangita sang giya sang ila Amay sa Langit. Nagabaton kag nagpasangkad sila sang ila mga calling sa Simbahan. Nagatambong sila sa ila mga miting. Nagahimo sila sang ila home ukon visiting teaching.

Isa ka hulubaton sang mga Aleman nagasiling, “Ang mga promisa kaangay sang bilog nga bulan. Kon ang mga ini indi matuman sing gilayon, magatahaw ang mga ini sing amat-amat.” Bilang mga miyembro sang Ang Simbahan ni Jesucristo sang mga Santos sa Ulihing mga Adlaw, nangako kita sa pagpangabuhi sa dalan sang pagkedisipulo. Nangako kita sa pagsunod sa halimbawa sang aton Manluluwas. Hunahunaa kon paano ang kalibutan mabugayan kag mabag-o para sa kaayuhan kon ang tanan nga mga miyembro sang Simbahan sang Ginuo magpangabuhi tuhoy sa ila matuodtuod nga potensyal—nahaylo sa kidadalman sang ila mga kalag kag nakapangako sa pagpasad sang ginharian sang Dios.

Sa pila ka paagi, ang tagsa sa aton nagatindog sa isa ka punto sang desisyon nga nagatamwa sa tubig. Akon ginapangamuyo nga makaangkon kita sang pagtuo, makapadayon, makaatubang sang aton mga ginakahangaw-an kag mga pagpangduhaduha nga may kaisog, kag maghambal sa aton mga kaugalingon, “Nakapangako ako!”

## PAGTUDLO GIKAN SA SINING MENSAHE

“Isa ka paagi sa pagbulig sa mga nagatuluon nga mahanapan ang mga prinsipyo sang ebanghelyo amo ang pagpadrowing sa ila sang mga larawan. Ang pagdrawing nagatugot sa ila sa pagtukib kag pagpahayag sang ila paghangop kag mga balatyagon tuhoy sa mga sugilanon kag mga prinsipyo sang ebanghelyo” (*Teaching, No Greater Call* [1999], 166). Binagbinaga ang pagbasa sang artikulo, nga nagatalakay sang prinsipyo sang pagdedikar sa ebanghelyo, kag dayon pangabaya kon sin-o man ang maluyag nga magdrawing sang larawan sang isa ka hilikuton sa ebanghelyo nga nagapakita sang dedikasyon. Ang mas magagmay nga kabataan mahimo nga magkinahanglan sang mga panugyan parte sa kon ano ang drowingon.

## LAMHARON

### Ang Tanan Nga Sarang Ko Mahatag Ni Alyssa Hansen

**N**agapalibog ako parte sa kon paano ako makabayad para sa mga butang nga luyag ko himuon sa tig-ilinit: mga klase, mga workshop, mga kamping kag iban pa. Daw mahibi ako. Dayon nadumduman ko ang tanan nga mga butang nga gintudio sa akon parte sa pag-angkon sang pagsalig kag pagtuo sa Ginuo. Nagpamat-od ako nga ibutang ang sitwayon sa mga kamot sang Ginuo kag magsalig nga kon yadto lya pagbuot, magapatigayon Sia sing paagi.

Wala madugayi pagkatapos sina, ang akon iloy nakanapo sang wala pa mabayluhi nga tseke gikan sa trabaho ko anay sa sina nga tuig, kag sa madason gid nga adlaw nakabaton ako sing sulat nga may gamay nga premyo nga kuwarta para sa pagdaug bilang ikaduha sa isa ka paindis-indis. Ini isa ka dako nga panaksihon para sa akon nga ang Dios buhi, nga Sia nagapalangga

kag nagaulikid sa akon kag magatigana (para sa akon).

Napuno ako sing pagpasalamat kag pagpalangga para sa akon Langitnon nga Amay kag Manluluwas. Sa pamatyag ko daw malupok ako! Luyag ko gid nga ipakita kon daw ano ako kamapinasalamaton, nga dayawon ang Dios sa pinakamaayo nga akon masarangan, kag magpaambit sinang balatyagon. Ang iban naghimo sini paagi sa pagkomposo sang isa ka ambahanon, pagsulat sang isa ka binalaybay, ukon

papginta sang isa ka larawan, apang sa pamatyag ko indi ko masarangan ang paghimo sang bisan diin man sinang mga butang. Akon nahunahuna nga ang bagay lamang nga akon sarang mahatag nga hustohan lang nga pagdayaw amo ang akon kabuhi—nga mangin “isa ka huwaran sa mga nagatuo” (1 Timoteo 4:12), sa paghatag sang akon kabuhi kay Cristo. Amo lang ina ang lya ginapangayo, kag amo lang ina ang tanan nga sarang ko mahatag.



# Kari sa Templo kag Batona ang Inyo mga Bugay

*Tun-i ining materyal kag, sa nagakaigo, hambali ini upod sang mga sister nga inyo ginabisita. Gamita ang mga pamangkot agud buligan kamo sa pagpabakod sang inyo mga sister kag himuong ang Relief Society nga aktibo nga bahin sang inyo mismo kabuhi.*

Pagtuo • Panimalay • Bulig

Mga sister, ginabugayan kita sing tuman. Ang Manluluwas nagatindog sa uluhan sining Simbahang. Ginagiyahan kita sing buhi nga mga propeta. May yara kita sing balaan nga mga kasulatan. Kag may yara kita sing madamo nga balaan nga mga templo sa bug-os nga kalibutan sa diin sarang kita makabaton sang mga ordinansa nga kinahanglanon sa pagbulig sa aton nga makabalik sa aton Langitnon nga Amay.

Nagakadto kita una sa templo para sa aton mga kaugalingon. “Ang pinakamayor nga katuyuan sang templo,” paathag ni Elder Robert D. Hales sang Korum sang Napulo’g Duha ka mga Apostoles, “amo ang pagpatigayon sang mga ordinansa nga kinahanglanon para sa aton pang-kahitaasan sa selestiyal nga ginharian. Ang mga ordinansa sang templo nagagiya sa aton padulong sa aton Manluluwas kag nagahatag sa aton sang mga bugay nga nagaabot sa aton paagi sa Pagpasag-uli [Atonement] ni Jesucristo. Nakilalan ang mga templo nga bilang mga dalagko nga mga unibersidad sang pagtuon, nga nagahatag sa aton sang ihibalo kag kaalam parte sa Pagtuga sang kalibutan. Ang mga panulin sa endowment nagahatag sang paggiya

parte sa kon paano kita dapat maggawi diri sa mortalidad. . . . Ang ordinansa nagalakip sang nagapasunod nga mga panulin kon paano kita dapat magkabuhi kag sa mga kasugtanang nga aton ginahimo sa pagkabuhi sing matarong paagi sa pagsunod sa aton Manluluwas.”<sup>1</sup>

Apang ang aton pag-alagad sa templo wala nagatapos dira. Si Pangulong Boyd K. Packer, Pangulo sang Korum sang Napulo’g Duha ka mga Apostoles, nagtudlo: “Sa paghikot bilang tal-os para sa isa ka tawo nga napatay na, narepaso mo na ngadaan ang mga kasugtanang nga imo nahimo. Napabakod mo na sa imo hunahuna ang dako nga espirituhanon nga mga bugay nga may kalabtan sa balay sang Ginuo. . . . Sa mga kasugtanang kag mga ordinansa nakasentro ang mga bugay nga mahimo mo batonon sa templo.”<sup>2</sup>

Kari sa templo kag magbalik liwat. Ang paghimo kag pagtipig sang mga kasugtanang sang templo magapatayuyon sa aton sa alagyan padulong sa pinakadako sa tanan nga mga bugay—kabuhi nga wala’y katapusan.

*Barbara Thompson, ikaduhang manuglaygay sa pangkabilugan nga panguluhan sang Relief Society.*

## Gikan sa Balaan nga mga Kasulatan

Isaias 2:3; 1 Mga Taga-Corinto 11:11; Bugna 7:13–15; Doctrine and Covenants 109

## Gikan sa Aton Kasaysayan

Ang propetang si Joseph Smith masami nga nagapamulong-pulong sa mga sister sang Relief Society sa ila mga miting. Sang ginapasad pa ang templo sa Nauvoo, ang Propeta nagpanulin sa mga sister sang doktrina, nga ginahanda sila sa pagbaton sing dugang nga ihibalo paagi sa mga ordinansa sang templo. Sang 1842 nagsiling sia kay Mercy Fielding Thompson nga ang endowment “magadala sa imo gikan sa kadulom padulong sa makahalangyang nga kasanag.”<sup>3</sup>

Ginabulobanta nga mga 6,000 ka mga Santos sa Ulihung mga Adlaw ang nagbaton sang mga ordinansa sang templo antes sang pagpanglakaton gikan sa Nauvoo. Si Pangulong Brigham Young (1801–77) nagsiling, “Subong sina ang pagkalangkag nga ginpakita sang mga santos agud makabaton sang mga ordinansa [sang templo], kag ang subong nga kalangkag sa amon bahin agud hikuton ini sa ila, nga lubos ko nga ginhatac ang akon

kaugalingon para sa buluhaton sang Ginuo sa Templo gab-i kag adlaw, nga wala nagaobra sa apat ka oras ang tulog, sa kinaandan, sa tagsa ka adlaw, kag nagapauli sa balay kis-a sa isa ka semana.”<sup>4</sup>

Ang kusog kag gahum sang mga kasugtanang sang templo nagpabakod sa mga Santos sa ila pagbiya sang ila banwa kag templo para sa pagpanglakaton padulong sa wala mahibaloan.

#### MGA TANDA

1. Robert D. Hales, “Blessings of the Temple,” *Liahona*, Okt. 2009, 14.
2. Boyd K. Packer, *The Holy Temple* (1980), 170, 171.
3. *Teachings of Presidents of the Church: Joseph Smith* (2007), 414.
4. *Teachings of Presidents of the Church: Brigham Young* (1997), 299.

#### **Ano ang Sarang Ko Mahimo?**

- 1. Ano nga eksperiensya ang mahimo ko ipaambit nga magapabakod sadtong akon ginabisita sa ila determinasyon sa “pagkari sa templo”?**
- 2. Paano ko personal nga mabaton ang mga bugay sang templo?**

Para sa dugang nga impormasyon, mag-log on sa [www.reliefsociety.lds.org](http://www.reliefsociety.lds.org).